

Aston

Tot mon engeing e mon saber
ai mes en un joi qe·m soste,
quan mi remembra ni·m sove
tan bona dompna·m fai chantar.
Adoncs mi deuri' esforsar
cum pogues far mon chan valer,
si ben trac greu martire
d'amor, cui soi servire.

Amors m'a si en son poder
e m'a fach comensar tal re
qu'ieu non puesc a mal ni a be
trair' a cap plus qu'al cel montar.
Per la genssor c'om pot trobar,
gardatz si·m deuri' escazer!
Qu'ieu l'am tant e deziere
qu'ailhors mon cor non vire.

Eu l'am mais que non fatz parer
e parli·n mais que no·s cove;
mais vuoill que m'aucia dese
si ja mais m'en auzetz parlar
ni ab dreich semblan esgardar,
tant sai cubertamen tener
e celar mon deziere
ab jogar et ab rire.

Lo reproviers non ditz ges ver
que ?cors oblida c'uoills non ve?
Ans a ben failhit enves me,
qu'ieu no la puosc er oblidar,
la bella cui non aus preiar,
tan tem failhir al sieu voler,
per qu'ieu planc e sospire.
Ai Amors! No m'aucire!

La nuoich qan sui anatz jazer
e·l jorn maintas ves s'esdeve,
cossir com li clames merce
qand ab lieis poiria parlar.
Adoncs m'o sai ieu ben pensar
e bos motz triar e vezer

e ma razon assire;
pois lai no sai que dire.

Ai las! cum cuidava aver
qualque pro en ma bona fe!
Cum plus sui desesperatz, cre
c'amors mi degues ajudar.
Eras no m'en sai conseilhar,
mas atendrai al sieu plazer.
Grieu er d'amor jauzire
qui no s'es francs sofrire.

E·l vers non es a dire
ses qui be·l sapcha dire.

- letto 811 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/aston-30>